

Piginnaangorsaaqqinnissamut ikiorsiisarneq pillugu Inatsisartut peqqussutissaattut siunnersuummut nassuiaatit

Naliginnaasumik nassuiaatit

Inuit sulisinnaassulittut ukiullit sapinngisamik amerlasuut suliinnarnissaannik imaluunniit sulileqqinnissaannik periarfissiinissaq kissaatigineqarmat piginnaangorsaaqqinnissamut peqqussutissatut siunnersuut saqqummiunneqarpoq.

Inatsisartut peqqussutaata aamma siunertarivaa kommunit siusinaartumik pensionisiaqalersitsinikkut piumasaqaatitaqanngitsumik pilersuinerannut sanilliullugu piginnaangorsaaqqinnermi suliniutinik aallartitsinissamut kajumissuseqalersinnissai.

Peqqussutissatut siunnersuutip saqqummiunneqannginnerani siunnersuutip imarisaa KANUKOKA aqutigalugu tusarniaassutaasimavoq, kommunillu aperineqartut piginnaangorsaaqqinnissaq pillugu peqqussummi suliniutiginiakkanik naammagisimaarinninnertik ersersippaat.

Siunnersuut sinaakutissanik pilersitsivoq najukkami periarfissarititaasut naapertorlugit kommunit ataasiakkaat immersorsinnaasaannik. Taamatut periuseqarnissaq toqqarneqarsimavoq sineriak tamakkerlugu atortussanngortinneqarsinnaasumik ersarinnerusumik inatsisiliornissaq ajornakusooramat.

Maannakkut siusinaartumik pensionisiallit sulisinnaaqqilernissaannut immikkut kommunit suliniuteqarnissaannut kajumissuseqarnerulersitsisumik immikkut ittumik bonusimik aaqquissuussineq pilersinneqassanersoq nalilersorneqarsimavoq. Piginnaangorsaaqqinneq siullermik inunnut suli siusinaartumik pensionisiaqalersimannngitsunut tunngatinneqarpoq, taamaattumik bonusimik aaqquissuussinermut maleruagassaliortoqanngilaq.

Inatsisinut allanut attuumassuteqarnera

Piginnaangorsaaqqinneq pillugu Inatsisartut peqqussutissaattut siunnersuut inatsisinut assigiinngitsunut arlalinnut attuumassuteqarpoq.

Pisortanit ikiorsiissutit pillugu Inatsisartut peqqussutaat, pisortanit pensionisiat pillugit Inatsisartut peqqussutaat aamma suliffissaaleqisunik sulisitsiniaaneq pillugu Inatsisartut peqqussutaat.

Manna tikillugu piginnaangorsaaqqittarneq pillugu aalajangersagaq erseqqissoq ataasiinnaavoq Inatsisartut pisortanit pensionisiaqarneq pillugu peqqussutaanni nr. 10-mi 30. oktober 1998-imeersumi allassimasoq. Peqqussummi tassani allassimavoq

"siusinaartumik pensionisiat pisartagaritinneqalinnginneranni kommunalbestyrelsip qinnuteqartoq ilinniartitaanikkut aamma/imaluunniit inuutissarsiornikkut periarfissat atorlugit piginnaanngorsaaqqinneq misilissimassavaa piginnaanngorsaaqqinnermut pilersarusiaq atorlugu".

Piginnaanngorsaaqqinnermut atatillugu kommunit tunngavigisarsimavaat suliffissaaleqisut sulilerseqqinnissaat pillugu Inatsisartut peqqussutaanni nr. 9-mi 3. november 1994-imeersumi aalajangersakkat assigiinngitsut tapiissuteqarnissamut periarfissiisut kiisalu pisortanit ikiorsiissutit pillugit Inatsisartut peqqussutaanni nr. 10-mi 1. november 1982-imeersumi aalajangersakkat annertusisamik pisariaqartitsineq naapertorlugu ikiorsiissutit pillugit aalajangersakkat.

Piginnaanngorsaaqqittarneq pillugu peqqussutip suliffissaaleqisunik sulilersitsiniarnermut peqqussummit allaassutigaa inuit pineqartut assigiinnginnerat. Taaneqartumi kingullermi suliffissaaleqisut sulisinnaassusillit suliffissaarusimanagerlu pissutigalugu sulisinnaanngikkallartut sulilersinniarneqarnissaat siunertaavoq.

Sulilersitsiniarnermut peqqussut suliffissaqartitsinnermut allaffinnit allaffissornikkut aqunneqarpoq suliffeqarnermullu tunngasuni suliniutaalluni, piginnaanngorsaaqqinnerli tassaalluni isumaginninnikkut suliniut isumaginninnermut allaffinnit aqunneqartoq.

Peqqussutissatut siunnersuutip akuerineqarnerata malitsigisaanik peqqussutit pisortanit ikiorsiissutinut tunngasoq, siusinaartumik pensionisiaqarnermut tunngasoq kiisalu suliffissaaleqisunut sulilersitsiniarnermut tunngasoq iluarsartuunneqartussaapput. Allannguutissatut siunnersuutit 2001-imi ukiakkut Inatsisartut ataatsimiinneranni saqqummiunneqassapput.

Kiisalu oqaatigineqassaaq inuit ataasiakkaat annertuumik innarluuteqartut, assersuutigalugu maluginnissinnaassutsikkut innarluutillit, Danmarkimi piginnaanngorsaaqqiffinni piginnaanngorsaaqqinneqartarmata. Taakkununga akiliut aaliangersimasooq annertuumik innarluutillit pillugit Inatsisartut peqqussutaat malillugu aningaasartuutigineqartarpoq. Innarluutilik siunissami piginnaanngorsaaqqinnermi ikiuutisisinnaassaaq maannakkutut pisortanit ikiorserneqarani.

Aningaasatigut kingunerisassat

Aningaasaliisarnerup iluarsartuuteqqinnerata kingunerissavaa, siusinaartumik pensionisiat 1. juli 2001 kingorna akuersissutigineqartut namminersornerullutik oqartussat kommunillu tamarmik immikkut 50%-ii akilertassagaat. Peqatigisaanik utertitsisarnermik aaqqissuussineq eqqunneqassaaq, taassumalu kingunerissavaa piginnaanngorsaaqqinnermut aningaasartuutit 50%-ii namminersornerullutik oqartussanit akilerneqartarnissaat.

Allannguinerup atuutilinnginnerani siusinaartumik pensionisiaqartunut nammaqatigiinnissamik isumaqatigiissutaasoq maanna piusoq atuutiinnassaaq,

tamatumani namminersornerullutik oqartussat 90%-imik kommunillu 10%-imik akiliisassallutik.

Aningaasalersuinerup allanngortinneqarnerata ataatsimut eqikkarlugu nalilersoqqinnissaani kommunit piginnaanngorsaaqqinnermut siusinaartumillu pensioninut aningaasartuutaat tamakkerlugit allanngortitsinerup siorna kingornalu naatsorsorneqassapput qulakkeerniarlugu kommunit aningaasartuutaat tamakkiisumik matussuserneqarnersut.

Piginnaanngorsaaqqinnermut AI 2001-mi tunngavissaasut malillugit namminersornerullutik oqartussat aningaasartuutaat annertuneruppata, Naalackersuisut isumaliuutigissavaat kommuninut ataatsimoorussamik tapiissutinut isumaqatigiissutinut atatillugu piginnaanngorsaaqqinnermut suliassaqarfik nalilersoqqissallugu pisariaqarnersoq.

Aalajangersakkat ataasiakkaat pillugit oqaaseqaatit

§1-imut

Naatsorsuutigineqarpoq maleruagassat inuit 18-it 63-illu akornanni ukiulinnut sullissinermi atuutsinneqassasut.

§ 2-mut

Piginnaanngorsaaqqinniarnermi patsisissaatitaasut ilagaat, pineqartooq naliginnaasumik atugassarititaasut tunngavigalugit sulinissamut imaluunniit ilinniarnissamut periarfissaqanngitsoq imaluunniit ataatsimut isigalugu sulinermut inatsisit tunngavigalugit. Siusinaartumik pensionisiallit piginnannngorsarneqarnissamut qinnuteqarsinnaapput allatulli piginnaanngorsaanissamut patsisissaatitaasut eqquutsinneqarnersut kommunimit naliliiffigineqarnissamik pisinnaatitaaffeqarlutik.

§ 3-mut

Inuup piginnaanngorsaaqqinnissamut inassutigineqannginnera makkuninnga pissuteqarsinnaavoq,

- 1) pineqartup naammattumik immikkullu ikiorserneqanngikkaluarluni sulisinnaassuseqarnera, taamattumik suliffissaaleqinerinnarmut attuumassuteqarluni, imaluunniit
- 2) pineqartup annikitsuinnarmik sulisinnaassuseqarnera pissutigalugu piginnaanngorsaaqqin-nissaq siunertalittut nalilerneqarsinnaanani. Taaneqartumut kingullermut attuumassuteqartut pineqartillugit siusinaartumik pensionisiaqalernissaq qinnutigineqarsinnaavoq.

Kommunip aalajangiinissaminut tunngavissiornerani paasissutissat atorsinnaasut tamarmik qinnuteqartumut tunngasut qinnuteqartumit namminermit allanillu attuumassuteqartunit pigineqartussaapput, tassunga ilaassallutik oqartussaasut assigiinningsunik suliallit suleqatigiiffiata inassuteqaatai.

Patsisissaatitaasut naapertorlugit inuup piginnaangorsaaqqinnissamut eqquutsitsineranik kommuni aalajangersaareeruni isumagisassaraa tamanna pillugu pineqartumut neqerooruteqarnissani.

§ 4-mut

Qulaajaanermut siunertaavoq siunissaq isigalugu piviusorsioortumik pilersarusiornissap anguneqarnissaa, periarfissanut isumassarsiornissaaq takunnissinnaangornissarlu kiisalu qinnuteqartup nukissaanik paasinninnissaaq imminullu tatigineranik nakussasaanissaaq.

Qulaajaanerup nalaani suliniutit ataasiakkaat arlallilluunniit makkua ingerlanneqarsinnaapput:

- 1) Namminersortut pisortalluunniit suliffeqarfiini sulinermik misiliineq.
- 2) Suliniutit inuussutissarsiornermut piorsaataasut imaluunniit qulaajaasut soorlu FSA/FSAU-mi ilinniartitsineq, pikkorissarnerit, hujskole suliaassanullu iseriartortitsinermit suliniutit.

Sulinermik misiliinerup siunertaraa sulisinnaassutsip qulaajarneqarnera aammalu mianersuuttarialimmik suliffeqarsinnaanermik paasisassarsiorneq, ukulluissuseqarneq, suleqatigiinnissamut piginnaassuseqarneq il.il. Sulinermik misiliinerup naammassineqarneratigut piginnaan-ngorsaaqqinnissamut periarfissat ilanngullugit qulaajarneqartussaapput.

Qulaajaanerup taassuma nalaani qinnuteqartoq pilersuinermit tunngavissarisimasaminik pisortatigut ikiorsiissutisisaannassaaq siusinaartumik pensionisiaqaannassalluniluunniit, taamaalilluni kommuni aaliangiissagaluarpat piginnaangorsaaqqinnermut patsisissaatitaasut eqquutsinneqanngitsut, pineqartoq piginnaangorsaaqqinnermut ikiuutisisarsimanermigut annertunerusumik aningaasatigut atugaqaleraluassanngimmat.

§ 5-mut

Piginnaangorsaaqqinneq makkununga sakkussaavoq

- 1) sulisinnaassutsip qulaajarneqarnera
- 2) sulisinnaangissutsip ersarissarnera
- 3) nutaamik suliffeqalernissaaq siunertaralugu piginnaangorsarneq.

Piginnaangorsaaqqinneq neqeroorutaavoq inuup suliffeqarnermut inisseqqinnissaanut ikiuutaaniartussaaq. Piginnaangorsaaqqinneq tassaagajunnerussaaq ilinniartitsineq, sungiusaaqqinneq imaluunniit suliffimmut

allamut sungiusarnej. Piginnaangorsaaqqinnissamut tunngaviussaaq inuup ilumut sulileqqissinnaanera.

Piginnaangorsaaqqinnermut malittarisassat assersuutigalugu makkununga tunngatillugu atorneqarsinnaapput:

- 1) Sulisuusup suliffeqarnermiitiinnarneranut suliffeqarnermulluunniit allamut inissinnissaanut
- 2) Ilinniartitaaneq - ilinniartitaaneq nalinginnaasoq atorlugu neqerooruteqarfiusinnaasoq
- 3) Inuk pilersuinnermut pisortaniit ikiutisisarpat qulaajaaneq suliniuteqarnerlu.
- 4) Pisariaqarpat eqaannerusumik suliaqarnermut ikaarsarneq.
- 5) Siusinaartumik pensionisiaqalernissamut ikaarsarneq.

§ 6-mut

Sulilluni misiliineq, suliniutit inuussutissarsiornermut piorsaataasut imaluunniit qulaajaasut, pikkorissarnissamik sungiusarnisanilluunniit pilersarusiat pisorta qarfiit imaluunniit namminersortut suliffiini ingerlanneqarsinnaapput. Imaappoq kommuniip nammineq iluani tamanna pisinnaasoq.

Ilinniarneq tassaasinnaavoq akisussaaffeqalissutaasoq aammalu sivilisunerusumik sivilinnerusumilluunniit pikkorissarneq, taamatullu tassaasinnaalluni pisortani namminersortuniluunniit pikkorissarnerit.

§ 7-mut

Suliffeqarfimmut tunngasumik piginnaangorsaaqqinneq tassaasinnaavoq suliassamut ilinniarnivik, suliarnut pikkorissaqqinneq, suliarnut ilinniarneq, pikkorissaqqinneq imaluunniit suliarnut allamut ilinniarneq.

Suliffeqarfimmi piginnaangorsaaqqinneq pisorta qarfiit imaluunniit namminersortut suliffiini sulinnermut misiliineq, sungiusarnej imaluunniit ilinniarnivik, matumani pineqarluni sullivik aallaavigalugu ilinniartitaaneq.

§ 8-mut

Isumaqtigiissutit malillugit akissarsiaqartitsinermik oqarnermi isumaavoq sulinnermik ilinniagaqarsimanngitsunut akissarsiaritinneqartartoq nalinginnaasoq. Piginnaangorsaaqqinnermi piginnaangorsartoq akissarsiutigalugu sularisimasaminik suliaqarpat akissaatit aalajangersarneqarsinnaapput atorfimmi ukiut suliffigisimasat amerlassusii naapertorlugit.

§ 9-mut

Suliffeqarfimmi piginnaangorsaaqqinneq aningaasarsianullu tapiissutit pillugit patsisissaatitaasut ersarinnerusut nalunaarummi aalajangersarneqassapput,

kingusinnerpaamik peqqussutip matuma atuutilerneranut atatillugu akuersissutigineqassalluni.

Naatsorsuutigineqarpoq Naalakkersuisut maleruagassanik aalajangersaassasut, suliffeqarfup piginnaangorsaaqqitaq aningaasarsitissagaa, piginnaangorsaaqqitap sulineranut naleqquttumik, aammalu kommunip aningaasarsianut aningaasartuutit suliffeqarfimmut isumaqatigiissuteqarsimaneq malillugu utertissagai. Tunngavissaritinneqarpoq piginnaangorsaaqqitaq sapinngisamik atorfeqartitaassasoq pisinnaatitaaffeqarlunilu aammalu pisussaatitaaffeqarluni suliffeqarfiup sulisuitut allatulli. Suliffeqarfimmi piginnaangorsaaqqinneq pillugu maleruagassaliormi isumaqatigiissuteqarnermi immersugassamik siunnersuusiortoqassaaq.

§ 10-mut

Piginnaangorsaaqqinnerup sivilissusissaa inummiit inummut nalilernerqassapput, apequtaalluni suliniutit suut aallartinneqarnersut.

Piginnaangorsaaqqinnerup nalaani piginnaangorsartoq suliffissarsisimangippat pineqartoq eqaannerusumik suliffeqarnermut imaluunniit pisariaqarpat pisortanit ikiorsiissutinut ikaarsaartinneqarsinnaavoq.

Piginnaangorsaaqqinnermut pilersaarut kommunip ataavartumik malittarissavaa qulakkeerniarlugu tapiissuteqarnissamut piumasaqaatit naammassineqarsimanersut.

§ 11-mut

Piginnaangorsaaqqinnermut pilersaarut neqeroorutiniq makkuninnga imaqassaaq

- 1) sulilluni misiliineq
- 2) suliniutit inuussutissarsiormut piorsaataasut imaluunniit qulaajaasut, assersuutigalugu hujskole, suliassamut iseriartortitsinermit suliniutit, pikkorissarnerit, FSA/FSAU-mi ilinniartitsineq il.il.
- 3) ilinniarnermut ilinniaqqinnermullu ikiorsiineq
- 4) suliamut allamut ilinniaqqinneq
- 5) pisortat namminersortulluunniit suliffeqarfini pikkorissaqqinnermut sungiusaqqinnermullu pilersaarutit
- 6) eqaatsumik suliffeqarnermut ikaarsarneq

Kommunip suliffeqarfini piginnaangorsaaqqinneq neqeroorutillu allat suliffeqarfinnut sammisut ineriartortillugillu nukittorsassavai. Sumiiffimmi pissutsit aallaavigalugit suliniarneq aqqissuunneqassaaq.

§ 12-mut

Piginnaangorsaaqqinnermi pilersaarusiaq pillugu patsisissaatitaasut ersarinnerusut nalunaarummi aalajangersarneqassapput, kingusinnerpaamik peqqussutip matuma atuutilerneranut atatillugu akuersissutigineqassalluni.

Naatsorsuutigineqarpoq aalajangersakkat piginnaangorsaaqqinnermi pilersaarusiamut piumasaqaatinik imaqqassasut ilinniagaqarnissamut imaluunniit ilinniaqqinnissamut ikiorsiinissamik, suliffimmut allamut sungiusarnissamut ikiorsiinissamik, imaluunniit sungiusaqqinnissamut neqerooruteqarnissamik, innarluutaasinnaasut imaluunniit ajutoornerit kingunerisaannik oqilisaasinnaasumik.

Aammattaaq naatsorsuutigineqarpoq nalunaarutikkut aalajangersarneqassasoq, kommunip piginnaangorsaaqqinnermut pilersaarusiaq nalilersoqqittassagaa, ataasiakkaatigut imaluunniit ataatsimut isigalugu eqquutsinnissaanut patsisissaatitaasut allannguuteqarpata.

Piginnaangorsaaqqinnermut pilersaarusiamut patsisissaatitaassaaq, piginnaangorsaaqqitaq piginnaangorsaaqqinnermut pilersaarusiap eqquutsinneqarnissaanut kajumilluni peqataassasoq, tamanna tamatumaluunniit ilai najugarivitap avataani ingerlanneqassangaluarpataluunniit, tamanna inuttut ilaqutariittulluunniit atukkat eqqarsaatigalugit erseqqissumik naleqqutinningsutut isigineqanngippat.

§ 13-mut

Piginnaangorsaaqqinnermut aningaasatigut ikiuutit akileraartarneq pillugu inatsisartut inatsisaanni § 24, imm. 1 nr. 11-mi taaneqartuni "pisortanit ikiorsiissutit"-nut ilanngilaq, taamaattumik piginnaangorsaaqqinnermut aningaasatigut ikiuutit isertitat akileraaruteqaataasussat naatsorsorneranni ilanngunneqartussaallutik, taamatullu aningaasartat A-tut akileraaruteqaataasussatut ilaasussaallutik.

Akerlianilli immikkut tapiissutit, piginnaangorsaaqqinnermut atatillugu ataasiaannartumik aningaasartuutitut pingaaruteqartunut tunniunneqarsinnaasut "pisortanit ikiorsiissutit"-nut ilaapput, taamaattumik isertitat akileraaruteqaataasussat naatsorsorneranni ilanngunneqartussaananani, taamatullu isertitatut allatut isumaginninnermi ikiorsiissutitut allanut naatsorsuinnermi tunngavissatut ilaasusnaanatik.

Piginnaangorsaaqqinnermut aningaasatigut ikiuutit piginnaangorsaaqqitap pisinnaatitaaffigaa, taamaattumik aapparisaq isertitai apequtaatinneqartussaananatik.

§ 14-mut

Piginnangorsaaqqinnermut aningaasatigut ikiuutisinissamut iluarsiinissamullu patsisissaatitaasut ersarinnerusut nalunaarummi aalajangersarneqassapput, kingusinnerpaamik peqqussutip matuma atuutilerneranut atatillugu akuersissutigineqassalluni.

Naalakkersuisut aalajangersassallugu naatsorsuutigaat piginnaangorsaaqqinnermut aningaasatigut ikiuutip qaammatikkuutaartumik SIK-p minnerpaatut akissarsiaritittangaa tunngavigalugu, annerpaamillu taassuma 70%-iatut annertussuseqarsinnaasoq kiisalu aalajangersassallugu piginnaangorsaaqqinnermut

aningsaatigut ikiuutip annikillilerneqartarnissaa, piginnaangorsaaqqitaq allamit suliffimmit ukiumut 12.000 kr. sinnerlugit isertitaqarsimappat, imaluunniit sillimmasiivinnit pensioninillu aqqissuussanit ingerlaavartumik aningaasanik pissarsisarpap, ilanngullugu Sulisilluni ajoqusernerit kingunerisassaannut sillimmasiinnissamik inatsisip Kalaallit Nunaanni atortuulersinneqarnissaanik peqqussut malillugu ingerlaavartumik inuussutissarsiorsinnaassutsimik annaasaqarnermut taarsiissutit, piginnaangorsaaqqinnermut aningsaatigut ikiuutip ilanngullugit piginnaangorsaaqqitap maannamut sulilluni isertitarisimasaanit taakku annertuneruppata.

Aammattaaq naatsorsuutigineqarpoq nalunaarut aalajangersakkanik imaqassasoq, piginnaangorsaaqqitaq kajumilluni piginnaangorsaaqqinnermut pilersaarummik eqquutsitsisutut isigineqartoq piginnaangorsaaqqinnerup ingerlanera sivikitsumik kipitinneqarnerini, piginnaangorsaaqqitap piginnaangorsaaqqinnermut pilersaarutip siunertaanut imarisaanullu tunngatillugu eqquutsitsinissaminut periarfissaanut tamanna ajoqutaanngippat.

§ 15-mut

Eqaannerusumik suliffeqarneq tassaavoq inuit tamakkiisumik sulisinnaanngitsut, kisiannili suliffimmi eqaannerusumik atugassaaqartitaagunik naammassisaqarsinnaasut. Tamanna inunnut pensionisiaqanngitsunut ataavartumilli sulisinnaassusaat killeqalersimasunut suliffeqarnermi suliassaaqartinneqarnissaannik periarfissaavoq.

Nalinginnaasumik sulisinnaanngortitsinissaq siunertaralugu piginnaangorsaaqqinnissamut periarfissat tamarmik periarfissaajunnaarsimappata aatsaat eqaannerusumik suliffeqarnissaq neqeroorutaasinnaalissaaq.

Eqaannerusumik suliffeqarneq aatsaat anguneqarsinnaavoq allatut iliornikkut akissarsiatigut tapiiffigineqarani sulilersoqarsinnaatinnagu.

Assersuutigalugu piginnaangorsaaqqinneq iluatsissimanngippat, paarsinarsisimappalli suli sulisinnaassuseqartoq eqaannerusumik sulinikkut iluaqutigineqarsinnaasumik.

Neqeroorut naapertuuttuussaaq, tassaasinnaallunilu piffissap ilaannaani sulisarneq. Kommuni aalajangigassaraa neqeroorut naapertuuttoq sunaanersoq.

Eqaannerusumik suliffeqarnermi akissarsiatigut tapiissutitalimmik atorfinittoqarsinnaavoq namminersortuni pisortanilu, kommuni ilanngullugu.

Eqaannerusumik suliffeqarnermut tapiissutit tunniunneqarsinnaapput tamatumani piumasaaqatit naammassineqarsimajuartillugit, tassalu qanoq sivisutigisumik tapiisarnissaq killiligaanngilaq.

Eqaannerusumik suliffeqartitsinissamut siunertaavortaaq siusinaartumik pensioneqalertartut killilersimaarniarlugit taarsiullugulu inuup sulisinnaassusianut naapertuussakkamik suliffissamik neqerooruteqarnissaq.

§ 16-mut

Aningaasarsiat sunniuteqarnermut tiimillu amerlassusaannut naleqquttumik aalajangersarneqassapput.

§ 17-mut

Eqaannerusumik suliffeqarnermut patsisissaatitaasut ersarinnerusut nalunaarummi aalajangersarneqassapput, kingusinnerpaamik peqqussutip matuma atuutilerneranut atatillugu akuersissutigineqassalluni.

Naalackersuisut naatsorsuutigaat aalajangersarneqassasoq, eqaannerusumik suliffimmi atorfinitsinneqarnermi aningaasarsiat allatigullu sulinermi atugassarititaasut, ilanngullugu sulinermi piffissaq, aallaaviatigut suliassaqarfimmi atorfeqarnermi isumaqatigiissutaasut atuuttut malillugit aalajangersarneqartassasut. Suliassaqarfimmi isumaqatigiissuteqarfiusimanngitsuni aallaavigineqassapput suliassaqarfimmi assersuunneqarsinnaasuni isumaqatigiissutit. Atorfeqartup kissaatigisimanngippagu ullup ilaannaa sulisarnissaq, naatsorsuutigineqassaaq eqaannerusumik suliffimmi ulloq tamaat atorfinitsitsinissaq.

§ 18-mut

Piginnaangorsaaqqinnissamut peqqussutip allaffitsigut aqunneqarnera kommunalbestyrelsip akisussaaffigaa.

Allaffitsigut aqutsinermut atatillugu kommunip kisitsisitigut nalunaarsuusiussavai peqqussut tunngavigalugu aaqqissuussinernik neqeroorfigineqarsimasut tamaasa.

Kisitsisitigut paasissutissat imarisinnaavaat paasissutissat makkua:

- 1) Piginnaangorsagaasup aqqa inuttullu normua,
- 2) pineqarnersoq piginnaangorsaaqqinneq, suliffeqarfimmi piginnaangorsaaqqinneq imaluunniit eqaannerusumik suliffeqarneq
- 3) aaqqissuussinerup qanga aallartinnera, sivisussusissaatut pilersaarutaasoq sivisussuserpiarlu
- 4) aaqqissuussinermi sapaatip akunneranut tiimit qassit ingerlanneqartarnersut
- 5) pineqarnersoq piginnaangorsaaqqinnermi ikiuutit, akissarsianut tapiissutit imaluunniit tapiissutit immikkut ittut.

§ 19-mut

Naalackersuisut KANUKOKA-llu ataatsimoortumik tapiissutit pillugit isumaqatiginninniarnernannut atatillugu isumaqatigiissutaavoq, piginnaangorsaaqqinnermut aningaasartuutit affai nunatta karsiata

anigaasartuutigissagai piunasaqaataalluni siunissami siusinaartumik pensionisianut anigaasartuutit allangortinneqarnissaat.

§ 20-mut

Isumaginnittoqarfiup aqunneqarnera aaqqissuussaanelu pillugit Inatsisartut peqqussutaanni aalajangersakkat naapertorlugit kommunip aalajangiinera sunaluunniit maalaarutigineqarsinnaavoq.

§ 21-mut

Peqqussut atortuulissaaq 1. juli 2001 inunnt ulloq taanna tamatumaluunniit kingorna kommunimut pisortanit ikiorsiissutinik imaluunniit siusinaartumik pensionisianik qinnuteqarlutik saaffiginnittunut, piginnaanngorsaaqqinnermik aallartitsinissaq naleqquttuutinneqarpat.